

Pilota ♦ Lehia ederrean, Eugi eta Elkorori 19-22 irabazi zieten San Fermin torneoko finalerdian

Ikuskizuna, Goñi II.arekin

Lasa III.arekin, Tirapu eta Belokiren aurka ariko da gaur, Labriten

Xabin Makazaga / Iruñea

ASPALDIKO partidurik onena eginda lortu zuten Goñi II.ak eta Lasa III.ak San Fermin torneoko finalerako txartela: 19-22, Eugi eta Elkororen aurka. Gaur gauean jokatuko dute finala, Labriten, Tirapu eta Belokiren aurka.

Ikusi gabe ez sinesteko moduko partidua izan zen here-negun gauekoa, Labriten. Eugi eta Elkorori 9-0 eta 13-4 aurreratu ziren, eta historia handirik gabeko lehia izango zela zirudien. Mikel Goñik, ordea, Oskar Lasak ederki lagunduta, buelta eman zion markagailuari: 13-12, 16-14, 16-17 eta 19-22. Nola eman ere, buelta! Ez baitzen Eugi eta Elkororen pattalaldiak eragina izan: jokatuz irabazi zuten urdinek, eta ez aurkari-rien hutsei esker.

Lau pilotariak oso txukun jardun zuten, eta piloteoan Goñi II.a edo Eugi zein hobeto sartu, horren arabera joan zen partidua. Guztien gainetik Mikel Goñik eginiko partidua nabarmendu beharra dago. Sasoi betean eta kolpearekin, partiduan sartu zenean hautsi egin zuen, eta erabaki. Huts pare batekin hasi zuen San Fermin torneoko finalerdia aurrelari oronoztarrak, eta ezinean jardun zuen lehen erdian. Gero, ordea, pilotari handi baten gisara jokatuko



Mikel Goñi ikusgarri aritu zen San Fermin torneoko finalerdian.

zuen Goñi II.ak. Eskuinean Elkorori apurtzeraino jo zuen, eta aurrean ere tanto bikainak egin zituen, ezkerrez zabalera berebiziko indarrarekin kolpatuz pilota.

Bederatzi tanto atzetik jo-

an arren, bai Goñik eta bai Lasak irabazteko gogoa zutela agerian utzi zuten. Buelta kostata eman zioten partiduari, Eugik eta Elkorok beren lana eginez jarraitu baitzuten azkenera arte. Baina

txikitzeke zeuden urdinak, eta txikizioa egin zuten.

Gaur berriro zaleek gainezka beteko dute Labrit pilotalekua, Goñi II.a-Lasa III.a eta Tirapu-Beloki bikoteen arteko finala ikusteko.

Zeberio II.a eta Aizpuru txapeldun Euskalen

Eduarne Elizondo / Iruñea
ZEBERIO II.a eta Aizpuru 34-40 nagusitu ziren atzo Uharteko Euskal Jai Berrin, Erremonteko San Fermin Torneoaren finalean, Elizalde II.a eta Eizagirrenen aurkakako partiduan.

Partidaren lehen zatian Elizalde eta Eizagirre jarri ziren aurretik eta erraz nagusitu ziren jokoan, baina Zeberio eta Aizpuruk markagailuari eta partidari buelta ematea lortu zuten. Lau pilotariak ongi aritu ziren, baina Aizpururen lasaitasuna eta lan serioa izan ziren partidako gako nagusiak. Elizaldek, gainera, ohi baino gehiago huts egin zuen eta Eizagirre

bakarrrik ez zen aurkariaren susperraldiari aurre egiteko gai izan.

Bina berdindu ondoren, 7-3 eta 15-5 jarri ziren aurretik Elizalde eta Eizagirre. Une horretan, ordea, Zeberio eta Aizpururen suspertzea iritsi zen, neurri handi batean, Elizalderen hutsei esker.

15-5 galtzen joan ondoren, 16-13 hurbildu ziren markagailuan urdinak, eta, azkenean, 23na berdintzea lortu zuten. Une horretatik aurrera lehia handia izan zen bi bikoteen artean eta markagailua parekatu egin zen. Azkenean, 34-40ko markagailuarekin, Zeberio eta Aizpuru txapeldun.



Zeberio II.a eta Aizpuru nagusitu ziren Euskalen.

txokoan

Arriaga-Felix eta Alberdi II.a-Arriaga finalerako txartel bila, Euskadiko Zesta Txapelketan

Gaur Markinan Euskadiko Zesta Txapelketako lehenengo finalerdia jokatuko dute Arriaga-Felix eta Alberdi II.a-Arriaga bikoteek. Bigarren finalerdia larunbatean izango da, eta Bereikua-Enbil eta Lander-Elizegi ariko dira lehian. Txapelketaren finala igande arratsaldean jokatuko dute bi bikote irabazleek, Markinan.

Plaza libreko Mastersa, gaurtik

Muskarditz-Biscoubey txapeldunek Maite-Teilleri bikotearen aurka hasiko dute Plaza libreko Mastersa, gaur, Bidarrain. Beste finalerdia Eugi-Gonzalezek eta Aranburu-Hirigoienek jokatuko dute, igandean, Azkainen. Eta bi bikote irabazleek Donapaleun jokatuko dute finala, uztailearen 23an.

gaurko partidua

LABRIT. 22:45.

- San Fermin torneoaren finala: Tirapu-Beloki / Goñi II.a-Lasa III.a.
- Alustiza-Imaz / Etxaniz-Goñi III.a.

ETXEBARRI. 19:30.

- Bizkaia Okena: Varela-Zabala / Begoñes-Korta.

RIVABELLOSA. 22:30.

- Telletxea-Fuertes / Tellería-Oliden.

BIDARRAI. 17:00.

- Plaza libreko Mastersa: Muskarditz-Biscoubey / Maite-Teilleri.

MARKINA. 22:30.

- Armendariz-Egiguren I.a / Berraondo-Goya.
- Euskadiko Zesta Txapelketaren finalerdia: Arriaga-Felix / Alberdi II.a-Arriaga.
- Goikoetxea-Goitia / Etxalus-Erkiaga.

DONIBANE-LOHIZUNE. 22:00.

- Barrio-Osa / Konpa-Barrondo.

biharko partidua

LAGUARDIA. 17:45. (Tele 5)

- Reteji II.a-Rai / Salaberria-Erasti.
- Beloki II.a-Pascual / Arbizu-Bariola.

ARENZANA. 20:00.

- Gorostiza-Nalda III.a / Minguez-Galarza VI.a.
- Unanue-Errendonea / Tirapu-Zearra.

ALMAZAN. 19:00.

- Etxaniz II.a-Inurategi / Otaegi-Errendonea III.a.
- Atxa-Almendoz / Haritz-Gastesi.

ARRIGORRIAGA. 17:30.

- Ogara-Alonso / Aurtentxe-Odrizola.

ADURZA. 11:30.

- Legorburu-Casado / Monreal II.a-Bazeta.

MARKINA. 17:00.

- Armendariz-Goya / Berraondo-Egiguren I.a.
- Euskadiko Zesta Txapelketaren finalerdia: Bereikua-Enbil / Lander-Elizegi.
- Egiguren II.a-Barrondo / Alberdi I.a-Goitia.

MIARRITZE. 22:30.

- A. Arriaga-J. Arriaga / Beaskoetxea-Aranburu.
- Mendi-Iratorza / Goikoetxea-Erkiaga.